

Raih keberkatan waktu Subuh

Berita dan Foto : Haji Ariffin Mohd. Noor / Morshidi

BANDAR SERI BEGAWAN, Ahad, 22 Januari. - Dalam usaha memakmurkan masjid, Kementerian Hal Ehwal Ugama (KHEU) melalui Jabatan Hal Ehwal Masjid, Pusat Da'wah Islamiah (PDI) dan Bahagian Kemajuan Syiar Islam dengan kerjasama Masjid Omar 'Ali Saifuddien telah mengelolakan Program Keagamaan 'Masjidku Makmur, Negara Berkat'.


Program yang diadakan itu turut memberikan peluang kepada para pengunjung ke acara mingguan Bandarku Ceria dengan memulakan hari mereka menunaikan tuntutan sembahyang fardu, berwirid dan seterusnya mendengarkan tazkirah agama.

Hadir dan menyertai bersama-sama para jemaah pada program tersebut ialah Menteri Hal Ehwal Dalam Negeri, Yang Berhormat Pehin Orang

Kaya Seri Kerna Dato Seri Setia (Dr.) Haji Awang Abu Bakar bin Haji Apong.

Turut hadir ialah Timbalan Menteri Hal Ehwal Ugama, Yang Mulia Dato Paduka Awang Haji Abdul Mokti bin Haji Mohd. Daud dan Datin, Setiausaha Tetap dan Timbalan Setiausaha Tetap Kementerian Hal Ehwal Dalam Negeri dan KHEU.

Tazkirah agama bertajuk 'Keberkatan Waktu Subuh' yang disampaikan oleh pegawai dari PDI, Awang Haji Badaruddin bin Haji Basar, antaranya menyentuh kelebihan ibadah sembahyang yang didirikan secara berjemaah di masjid, di samping meraih keberkatan dan ketenangan lebih-lebih lagi Sembahyang Fardu Subuh. Beliau turut menghuraikan kelebihan mendirikan Sembahyang Sunat sebelum Subuh yang



MENTERI Hal Ehwal Dalam Negeri, Yang Berhormat Pehin Orang Kaya Seri Kerna Dato Seri Setia (Dr.) Haji Awang Abu Bakar bin Haji Apong (kanan sekali) semasa hadir pada Program Keagamaan 'Masjidku Makmur, Negara Berkat' yang diadakan di Masjid Omar 'Ali Saifuddien.

mempunyai banyak kelebihan berupa ganjaran yang sangat besar kepada mereka yang melakukannya.

Menurut pihak pengajar dengan adanya program seperti ini diharap akan dapat memakmurkan masjid yang merupakan rumah Allah dan seterusnya menggandakan amal kebajikan dan meraih keberkatan dari Allah Subhanahu Wata'ala untuk diri sendiri, keluarga dan negara.

Kepentingan adab dalam menuntut ilmu adalah penting



PENSYARAH Fakulti Syariah dan Undang-Undang Universiti Islam Sultan Sharif Ali, Dr. Widad binti Haji Abdul Aziz menyampaikan ceramah bertajuk 'Sekalung Ijazah Impianmu, Adab Belajar Tanggungjawabmu' pada Majlis Program 'Kurapak Kitani Siri Ke-5'.

Siaran Akhbar dan Foto : Universiti Islam Sultan Sharif Ali

BANDAR SERI BEGAWAN, Ahad, 22 Januari. - Para pelajar perlu mempunyai sifat sabar dalam menuntut ilmu kerana sebagai seorang pelajar, memang menghadapi berbagai-bagi cubaan terutama mempunyai komitmen yang banyak dalam membuat kajian dan sebagainya.

Oleh itu, kejayaan tidak akan

tercapai tanpa adanya kesabaran dan janji Allah ialah akan memberi jalan Syurga kepada orang-orang yang sabar termasuklah juga dalam menuntut ilmu.

Beberapa juga, perlunya ada kesungguhan dalam menuntut ilmu itu.

Demikianlah antara inti pati ceramah bertajuk 'Sekalung Ijazah

Impianmu, Adab Belajar Tanggungjawabmu' yang disampaikan oleh Pensyarah Fakulti Syariah dan Undang-Undang Universiti Islam Sultan Sharif Ali (UNISSA), Dr. Widad binti Haji Abdul Aziz pada Majlis Program 'Kurapak Kitani Siri Ke-5'.

Selain itu, beliau juga menekankan untuk tidak bersifat sombong dan riak selepas mendapat ilmu kerana sesungguhnya semua ilmu itu datangnya daripada Allah Subhanahu Wata'ala.

Program adalah anjuran UNISSA melalui Bahagian Hal Ehwal Pelajar (HEP) dengan kerjasama Majlis Perwakilan Pelajar (MPP) bertempat di Auditorium universiti berkenaan.

Majlis terlebih dahulu dimulakan dengan bacaan Surah Al-Fatiyah beramai-ramai dan diselajurkan dengan ceramah yang dihadiri oleh kira-kira 300 orang terdiri daripada para pegawai dan kakitangan serta mahasiswa / mahasiswi UNISSA.

Antara objektif program adalah untuk memberi kesedaran tentang kepentingan adab di dalam menuntut ilmu dan menerapkan nilai-nilai murni yang perlu ada bagi diri mahasiswa / mahasiswi agar dapat diaplikasikan semasa berada di universiti atau di luar universiti.

Pada akhir program, para mahasiswa / mahasiswi berpeluang mengajukan beberapa persoalan pada sesi soal jawab bersama penceramah.



SERAMAI 300 orang terdiri daripada para pegawai dan kakitangan serta mahasiswa / mahasiswi UNISSA yang hadir pada majlis tersebut.

Saluran tambahan DARE di Talian Darussalam 123

Siaran Akhbar : Darussalam Enterprise

BANDAR SERI BEGAWAN, Ahad, 22 Januari. - Pada 1 Januari 2017, Darussalam Enterprise (DARE) mempunyai saluran tambahan menggunakan Talian Darussalam 123 untuk orang ramai berkongsi isu-isu berkaitan perniagaan, pertanyaan dan cadangan mereka.

Menurut Siaran Akhbar DARE, di samping Talian Darussalam 123, komuniti perniagaan boleh terus menggunakan cara lain untuk saluran termasuk DARE online Business Helpdesk (BHD) yang boleh dilayari melalui <http://www.business.gov.bn/businesshelpdesk/Home.aspx> atau hubungi hotline DARE melalui talian +673 8363442 atau e-mel dare@ei.gov.bn.

Perkhidmatan BHD juga disediakan di Business Support Centre (BSC) yang berfungsi sebagai tempat / portal tunggal untuk individu berurusan atau memproses apa-apa isu yang berkaitan dengan perniagaan atau aplikasi.

BSC terletak di Bangunan Design and Technology di Taman Teknologi, Anggerek Desa juga di Bangunan Lembaga Bandaran Kuala Belait dan Seria.

Untuk mengetahui lebih lanjut mengenai perkhidmatan di bawah kedua-dua buah cawangan, maklumat lanjut boleh diperoleh di www.dare.gov.bn.

Sejak penubuhan DARE pada bulan Februari tahun lalu, pada 12 Januari 2017, BHD telah log masuk sejumlah 1,830 isu yang berkaitan dengan perniagaan dan telah menyelesaikan 99 peratus daripadanya, tidak termasuk isu-isu lewat pembayaran.

Pengendali teksi haram dikenakan tindakan tegas

Siaran Akhbar : Jabatan Pengangkutan Darat

BANDAR SERI BEGAWAN, Ahad, 22 Januari. - Jabatan Pengangkutan Darat (JPD) mengeluarkan amaran keras terhadap aktiviti teksi haram yang beroperasi di negara ini.

Jabatan berkenaan dalam siaran akhbarnya menyatakan bahawa, operasi teksi haram adalah suatu kesalahan yang boleh dikenakan kompaun dan tindakan tegas akan diambil terhadap pesalah. Melalui operasi pemantauan dan pengawasan JPD yang dijalankan sejak beberapa bulan lalu lebih 260 kenderaan berprofil turut menjadi perhatian melalui penelitian pegawai-pegawai penguat kuasa JPD.

Hasil dari pemantauan dan operasi tambahan dari JPD dan Pasukan Polis Diraja Brunei, setakat ini seramai enam orang telah dikenakan denda dan seorang warga asing telah dihantar kepada pihak berkuasa yang bertanggungjawab untuk tindakan selanjutnya.

JPD dengan ini mengeluarkan amaran keras kepada warga asing yang menjalankan aktiviti-aktiviti haram. Sebagai tambahan kepada denda kompaun, rujukan selanjutnya kepada pihak berkuasa berkaitan, boleh menyebabkan mereka dihantar keluar dari Negara Brunei Darussalam.

Operasi Pemantauan juga telah mengenal pasti syarikat-syarikat yang memiliki kereta sewa persendirian atau 'Kereta Sewa Pandu Sendiri' (KSPS) menggunakan kereta mereka untuk menjalankan aktiviti menyalahi undang-undang yang sama. Hasil dari operasi tersebut dua lesen syarikat kereta sewa persendirian telah dibatalkan oleh Lembaga Melesesen Pengangkutan Bermotor (MTLA).

Sistem Teksi Bermeter yang telah dilancarkan pada 23 September tahun lepas telah berjaya meningkatkan keyakinan orang ramai terhadap peraturan tambang teksi dan perkhidmatan.

Untuk memastikan imej positif ini dikenalkan ke arah penambahbaikan perkhidmatan-perkhidmatan teksi dengan lebih signifikan secara keseluruhannya di negara ini, orang ramai dan para pelancong dialu-alukan untuk mengemukakan komen dan aduan ke JPD melalui mesej WhatsApp melalui talian +673 7292017 atau melalui e-mel kepada jpdptg@landtransport.gov.bn, bagi sebarang penyalahgunaan meter teksi atau apa juar insiden caj teksi yang berlebihan oleh para pemandu teksi.